



بِسْمِ اللَّهِ الرَّحْمَنِ الرَّحِيمِ

“БИР ҲАДИС ШАРҲИ: “....биздан эмас” ҳадислар туркуми”

Муҳтарам жамоат! Қуръони карим ва ҳадиси шарифларда ислом аҳли учун берилган қўрсатмаларда фақат эзгуликка даъват этилган. Инсонларни ўзаро аҳил, меҳр-оқибатли, адолатли бўлиш каби қатор инсонийлик фазилатларга чақириш динимизнинг асосий мақсади экани барчамизга кундек равшан. Шунинг учун ҳам динимиз ёлғончилик, хиёнат, фирибгарлик, бераҳмлик ва золимлик каби иллатларни қоралайди ҳамда бундай амалларни содир этувчиларни комил имонли мўминлар қаторида ҳисобламайди. Бугунги мавъизамида ана шу мазмундаги ҳадислардан айримлари билан батафсил танишамиз.

Расулуллоҳ саллаллоҳу алайҳи васалламнинг одатларидан бири бозорда бўлаётган ишларни айнан ўзлари кузатиш эди. Ана шундай кузатишларидан бири ҳикоя қилинган ҳадисда шундай дейилади:

﴿أَنَّ رَسُولَ اللَّهِ صَلَّى اللَّهُ عَلَيْهِ وَسَلَّمَ مَرَّ عَلَى صُبْرَةِ طَعَامٍ فَأَذْخَلَ يَدَهُ فِيهَا، فَنَالَّتْ أَصَابِعُهُ بِلَلَّا فَقَالَ: "مَا هَذَا يَا صَاحِبَ الطَّعَامِ؟"﴾

﴿قَالَ أَصَابَتْهُ السَّمَاءُ يَا رَسُولَ اللَّهِ، قَالَ: "أَفَلَا جَعَلْتَهُ فَوْقَ الطَّعَامِ كَيْ يَرَاهُ النَّاسُ، مَنْ غَشَّ فَلِيسَ مِنِّي"﴾

(رواه الإمام مسلم عن أبي هريرة ﷺ)

яъни: “Расулуллоҳ саллаллоҳу алайҳи васаллам бир буғдой сотувчининг олдидан ўтиб, қўлларини буғдой уюми ичига тиқсалар, унга хўллик тегди. Шунда: “Эй, буғдой эгаси, бу нимаси?” деб сўрадилар. Шунда у киши: “Ё Расулуллоҳ унга ёмғир теккан эди”, деди. Расулуллоҳ алайхиссалом: “Сиз ўша жойини одамлар қўриши учун тенасига чиқариб қўймайсизми?” деб танбеҳ бердилар ва изидан: “Ким алдаса, биздан эмас”, дедилар (Имом Муслим ривоятлари).

Пайғамбаримиз саллаллоҳу алайҳи васаллам бундан бошқа бир қанча ҳадисларида “биздан эмас”, деган машхур иборани ишлатганлар. Бу иборадан нимани назарда тутганликлари борасида уламоларимизнинг бир-бирига яқин шарҳлари мавжуд. Ибн Ҳажар Асқалоний ушбу ҳадис шарҳида мазкур иборани “бизнинг ўйлимизда ва суннатимизда эмас” маъносида деб шарҳлаб, бу иборани ишлатилиш – ўша гуноҳнинг нақадар оғир эканига ишорадир деганлар. Шунга ўхшаш фикрларни имом Нававий ҳам келтирганлар. Айрим уламоларга кўра, ушбу иборанинг маъноси “комил имонли мўминлардан эмас, балки имонлари борку, лекин нуқсонли”, деб ҳам шарҳлаган.

Ҳадисда исломнинг ҳалоллик ва омонатдорликка нақадар катта аҳамият бергани қўриниб турибди. Шундан келиб чиқиб бозор ва савдо марказларидағи мутасаддилар вақти-вақти билан мана шундай текширув ва назоратларни ўтказиб, юртдошларимиз ҳақига хиёнат қилаётганларга нисбатан танбеҳ ва огоҳлантириш бериб туришлари ўрни келганда жазога тортишлари ҳам тўғри бўлар экан.

Мұхтарам азизлар! Ҳадисдаги энг мұхим ибратлардан бири бугунги кундаги қўплаб савдогарларда етишмаётган одатни баён қилиб берилганидир. У ҳам бўлса, молниг айбини ошкор қилиб сотишлик. Буни Расулуллоҳ саллаллоҳу алайҳи васалламнинг “*Сиз ўша жойини одамлар кўриши учун тенасига чиқариб қўймайсизми?*”, деган сўzlари тасдиқлаб турипди. Башариятга муаллим ва гўзал хулқларни мукаммал қилиш учун юборилган зот бундай ёлғон ёнида сукут сақлашлари мумкин эмас эди. Ҳақиқий раҳнамолар ана шундай бўлишлари керак. Бундай ёвузликлардан пора ёки таниш-билишчилик эвазига қўз юмиб кетмасликлари лозим. Уларга барча инсонлар ҳақ-хуқуқлари омонат топширилган. Мана шундай ўринда ундейларни кечириш булар учун раҳмдиллик эмас, балки бу пасткашлик, хиёнат ва очқўзликдир. Ҳақиқий комил имонли мусулмон биродарларига фақат яхшиликни раво кўради. Бошқа ҳадиси шарифда Пайғамбаримиз саллаллоҳу алайҳи васаллам бундай дедилар:

﴿لَا يُؤْمِنُ أَحَدُكُمْ، حَتَّىٰ يُحِبَّ لِأَخِيهِ مَا يُحِبُّ لِنَفْسِهِ﴾ (متفق عليه أنس بن مالك ﷺ).

яъни: “*Бирортангиз ўзига яхши кўрган нарсасини биродарига раво кўрмагунча (комил) имонли бўлмайди*” (Муттафақун алайҳи).

Мусулмон ўзини бошқалар томонидан алданишини ёқтирмас экан, демак, у бошқаларни ҳам алдамаслиги керак. Мана шу сабабдан динимизда ёлғон, алдов ва ҳийлакорлик ҳаром қилинган.

Савдо-сотикдаги алдов турлари жуда ҳам кўп. Буларнинг барчаси ҳаром. Аввало, тарози ва ўлчовлардан уриш. Бу ҳақида Аллоҳ таоло Куръони каримда:

﴿وَأَوْفُوا الْكِبَلَ إِذَا كِلْمُمْ وَزِنُوا بِالْقِسْنَطِسِ الْمُسْتَقِيمِ﴾ (الإسراء: 35).

яъни: “(Савдо-сотикда) ўлчаган вактларингизда ўлчовни тўла-тўкис қилингиз ва тўғри тарозида тортингиз!” (Исро сураси, 35-оят), деб марҳамат қилган ва бу буйруқ шаклида келгани учун вожибликка далолат қилса, бошқа оятда тарози ва ўлчовдан урувчиларнинг ҳолига вой ва азоби оғир бўлиши баён этилган:

﴿وَيَلِ لِلْمُطَّغِينَ﴾ (المتفون، 1).

яъни: “(Савдо-сотикда ўлчов ва тарозидан) уриб қолувчи кимсалар ҳолига вой!” (Мутаффифун сураси, 1-оят).

Ана шундай зулм мусулмонлар бозорида ортиқ бўлмаслиги учун Расулуллоҳ саллаллоҳу алайҳи васаллам Макка фатҳидан сўнг Саъд ибн Саъид ибн Осни Макка бозорига, Умар разияллоҳу анхуни эса Мадина бозорига масъул қилиб тайинлашлари ҳам бежиз эмас. Бу эса у зотнинг бозор ишларига эътибор бериб, тарозибонни ҳалол ўлчаб-тортиши, адолатли ва муруватли бўлишига жиддий қараганларини англатади.

Сувайд ибн Қайс разияллоҳу анхудан ривоят қилинади, Расулуллоҳ саллаллоҳу алайҳи васаллам ёнимизга келдилар ва бозор аҳлининг ўлчаб-тортиб берадиган тарозибонига:

﴿يَا وَرَّانْ زِنْ وَأَرْجُحْ﴾ (رواه الإمام أَبْنِ ماجة عن سَوَيْدِ بْنِ قَيْسٍ ﷺ).

яъни: “Эй, тарозибон, ўлчанг ва палласини оғир қилинг”, деб тайинлаганлар” (Имом Ибн Можа ривоятлари). “Палласини оғир қилинг” деган сўzlари буюмни ўлчаганда, мол палласини оғирроқ қилинг, деганидир.

Бундан ташқари бугунги кунда сутга сувни, асалга қиёмни, цементга қум ёки бошқа моддаларни аралаштириш, нархни кўтариш учун сунъий харидор

бўлиш, содда одамларни лаққилатиши каби алдов турлари кенг тарқалди. Охиратдаги савол-жавобни унугтган инсон қиёфасидаги шайтонлар томонидан янгидан-янги фирибгарликлар “кашф” қилиниб келинмоқда. Молларни ишлаб чиқарилган жойларини нотўғри айтиш ёки яшириш, аслий бўлмаган молларни аслий дейиш, сунъий буюмларни табиий дейиш ва бошқа фириб ёки алдовлар кўпайиб кетди.

Шунингдек, бугунги кунда ҳаётимизга электрон ҳисоб-китоблар, пластик карталарни амалиётда кенг қўллашлик кириб келгани учун қаллобликнинг яна бошқа янги-янги турлари пайдо бўлди. Айниқса, одамларга интернет орқали қилинадиган савдоларда сифатли молни кўрсатиб, сифатсизини бериш ёки картанинг махфий кодини сўраб олиб, кейин ундаги маблағларни ўзлаштириб олиш каби зулмлардан жуда кўплаб юртдошларимиз азият чекмоқдалар.

Бундай қаллобликлар савдо-сотикдан ташқари кўплаб касбларда ҳам ўзига мос равищда амалга оширилмоқда. Кира қилишликда масофани сунъий кўпайтириш, қурилишда материалларни керагидан кам ёки ишончсиз бўлганларини ишлатиши, шунингдек, йўл қурилиши, ҳаттоки дорихонаю шифохоналарда ва бошқа кўплаб соҳаларда турли-туман кўзбўямачиликларга йўл қўйилиши ҳам хиёнат ва ноҳақ йўл билан бойлик орттиришга киради. Ваҳоланки, Аллоҳ таоло била туриб хиёнат қилишликдан қайтариб, бундай марҳамат қилади:

إِنَّ اللَّهَ لَا يُحِبُّ كُلَّ حَوَانٍ كَفُورٌ (الحج، 38).

яъни: “**Албатта, Аллоҳ барча хоин ва ношукурларни суймас**” (Ҳаж сураси 38-оят). Қолаверса, Пайғамбаримиз саллаллоҳу алайҳи васаллам ҳадиси шарифларида:

وَالْمُكْرُرُ وَالْخَدِيْعَةُ فِي النَّارِ (رواه الإمام الطبراني).

яъни: “**Макр ва алдов дўзахдадир**”, деганлар (Имом Табароний ривоятлари).

Демак, алдов, фирибгарлик, бирор нарсани сохталаштириш мусулмоннинг иши эмас.

Ҳаром луқмадан ва бироннинг ҳаққидан қўрқмайдиган кишиларнинг фарзандлари ўzlари орзу қилгандек одам бўлишадими? Йўқ, албатта! Улар ҳам нари борса бироннинг ҳаққидан қўрқмайдиган ва энг ёмони, ота-она розилигини топишга рағбат қилмайдиган кимсалар бўлади, Аллоҳ асрасин! Чунки Пайғамбаримиз саллаллоҳу алайҳи васаллам:

لَا يَدْخُلُ الْجَنَّةَ حَمْ نَبَتَ مِنْ سُختٍ (رواه الإمام ابن حبان عنْ جابر بن عبد الله رضي الله عنهما)

яъни: “**Ҳаром еб ўсган вужуд жаннатга кирмайди**”, деганлар (Имом Ибн Ҳиббон ривоятлари).

Мусулмонлар ҳар доим омонатдорлик хислатлари билан бошқа халқларнинг меҳр-муҳаббатини қозона олганликларига тарихда жуда ҳам мисоллар кўп. Лекин инсонларнинг бошига қийинчилик тушгандан фойдаланиб қолиш мусулмон кишисига ҳеч қачон тўғри келмайди. Афсуски, юртимизга атиги бир-икки кун чироқ ўчиши сабаб келган синов пайтида айрим ватандошларимиз шахсий манфаатни ҳамма нарсадан юқори қўйиб, халқига хиёнат қилишга мойилликларини қўрсатиб қўйишиди.

Муҳтарам азизлар! Агар биз ҳақиқий исломни даво қилсак, ўзимизга юклатилган барча ишларга сидқидилдан ёндошайлик. Агар бундай қилмасак, ўз халқимизга, миллатимизга ва унинг тараққиётига қарши курашгандек бўлиб

қоламиз. Қайси ишда хиёнат аралашса, албатта, ундан барака олиб қўйилади. Ундаинсонлар бизнинг сафимизда бўлишга лойик эмас. Шунинг учун ҳам биз ўрганаётган ҳадиснинг охирида Пайғамбаримиз саллаллоҳу алайҳи вассаллам нам буғдойни яширган кишига қарата жуда ҳам оғир сўзни айтдилар: “**Ким алдаса, бизлардан эмас**”.

Бу каби ўта оғир сўзларини Расулимиз саллаллоҳу алайҳи вассаллам яна бир қатор ўринларда ишлатдилар. Жумладан, бир ўринда бундай марҳамат қилдилар:

﴿مَنْ حَمَلَ عَلَيْنَا الْبِلَاحَ فَلَيَسْ مَنَّا﴾ (رواه الإمام البخاري عن ابن عمر رضي الله عنه).

яъни: “**Ким бизларга қарши қурол қўтарса, бизлардан эмас**” (Имом Бухорий ривоятлари). Маълумки, юртга ва ҳалққа хиёнат энг катта хиёнатлардан ҳисобланади. Ҳадисдан кўриниб турибдики, ҳалқига диндошлирига қарши қурол қўтаришни ҳаром қилган исломни ниқоб қилиб олиб, турли юртлардаги жангариларга қўшилиб кетаётганларга Пайғамбаримиз саллаллоҳу алайҳи вассаллам “**бизлардан эмас**”, демоқдалар.

Муҳтарам жамоат! Динимизда бузғунчилик, оиласарнинг тинчини бузиш ва эрхотин ўртасини ажратиш ҳам жуда катта жиноятлардан ҳисобланади. Шунинг учун Пайғамбаримиз алайҳиссолату вассалам бундайларни бизлардан бўлишга лойик эмасликларини таъкидлаганлар:

﴿لَيْسَ مِنَّا مَنْ حَبَّبَ إِمْرَأَةً عَلَىٰ رُوْجَهَا أَوْ عَبْدًا عَلَىٰ سَيِّدِهِ﴾ (رواه الإمام أبو داود عن أبي هريرة رضي الله عنه).

яъни, “**Хотинни эри ёки қулни хожаси билан ўртасини бузганлар бизлардан эмас**” (Имом Абу Довуд ривоятлари).

Бугунги кундаги энг разил ва энг хунук бузғунчиликлардан бири мана шу ҳадисда келтирилган ҳали никоҳлари бор бўлиб бирга яшаб турган жуфтнинг ўртасини бузишdir. Айрим ичиди фисқ-фужури бор кимсалар бировларнинг хотинини авраб, гўёки уларни яхши кўргандек қилиб кўрсатиб, ажрашишликка олиб келадиган сўзларни изҳор қиласди. Ахир динимиз бировнинг ҳали уйланмаган, шунчаки совчи қўйган аёли устига совчи қўйишиликдан қайтарган бўлса, бировнинг никоҳидаги аёлга қўз олайтиришни қандай оқлаши мумкин. Албатта, бундай қилганлар бизларни сафимизда бўлишга лойик эмас.

Азизлар! Китоб динимиз, тарихимиз ва бошқа барча соҳадаги илм-маърифатимизни оширишга хизмат қилувчи энг асосий восита. Бизнинг диёр азалдан алломалар юрти бўлгани учун қадимдан юртдошлиаримиз қўлларида бир қатор қимматбаҳо ва нодир китобларнинг қўллэзма ва тошбосма нусхалари мавжуд. Уларни айрим нотўғри йўллар орқали бойлик орттиришга ҳарис инсонлар одамлардан арзимас пулга сотиб олиб, қинғир йўллар орқали бойликларимизни хорижга чиқиб кетишига ҳаракат қилиш йўли билан ҳалқимизга хиёнат қилиб келаётганлар бор.

Афсуски, бაъзи юртдошлиаримиз бундай асарларни сақлаш қонун-қоидаларига риоя қилмасдан уларни уйда сақлаб, ачинарли ҳолатларга келиб қолганини гувоҳи бўлмоқдамиз. Шунинг учун кимда мана шундай аждодларимиздан мерос қолган қўллэзма ва тошбосма асарлар бўлса, соҳа мутахассислари билан маслаҳат қилиб, сақлаш учун зарур ҳарорат ва намликини таъминлашга ҳаракат қилишлари ёки маҳсус марказларга топширишлари мумкин.

Аллоҳ таоло барчаларимизни динимизга тўлиқ амал қиладиган, ёлғон, хиёнат каби разил сифатлардан сақланадиган, меҳр-оқибатли, ахил-иноқ яшайдиган ва бошқаларга фақат яхшилик улашадиган бандалардан бўлишимизни насиб айласин! Омин!